

楊文恪公文集

楊文恪公文集卷二十五

序

飭齋文集序

文章以理爲主理在天下目孔孟以來千有餘年始
大明于宋當時有謂洛學起而文字壞有謂二三大
儒之詩乃經義策論之有韻者自今觀之定性書易
春秋傳序先秦史漢果有之乎擊壤集游山感興諸
作魏晉盛唐果有之乎不本之求而惟末之尚名之
曰反理之評殆非過也上舍李原道持其尊公先生
飭齋文集徵予序之予非能知詩文者特以理爲之

主則亦有可得而言者焉集中有賦有古選近體詩
有序記有碑銘有雜文衆體皆備次第而讀之但見
不恃其富而出之徐徐殊未竭也善藏其鋒而施之
恢恢自有餘也雍容暇豫而不見其急迫沉靜審度
而不覺其張皇如絲在繭愈縑而愈有如泉在山愈
浚而愈來一言以蔽之主乎理而已此非以洛學為
的以二三大儒為師能如是乎若其出入乎先秦史
漢之間馳驅乎魏晉盛唐之境又不論也公為人持
正而不阿挺立而不矯治已之嚴密存心之忠厚有
過人者與仲兄方伯公齊名說者謂其是玉璫之次

之友乃相門江生瓊其椿庭養正達躋高壽全歸於
人壽事必徵壽以爲慶夫旣稔其人而於其人之親
之壽能默默承願徼惠於先生予請還坐而固辭之
明遠懇懇不容釋因問之曰養正何如壽則曰歲曆
維單蘭月癸亥著執徐歷四石有八十甲子長於絳縣
老人蓋千年矣復問之曰養正何如人則又曰壯年
友膠鬲而侶范蠡晚境排巢父而拉許由中間効卜
式之焉而膺七秩散衙焉客有贊於列者曰明遠先
生同郡人於此不宜有難色予笑曰然然予之不爲
此也久矣於是呼石鄉侯則塵埃滿面矣呼管城子

則頭童齒豁矣呼易玄光則摩頂放踵矣皆次第至前一慰藉之令與楮知白共事俾持以爲養正壽

贈外科范生序

高醫豈世出哉近代如劉守真張潔古或著方或不著方其大旨惟許魯齋能言之餘人鮮得而盡窺也至李明之寔處古及闕之弟子乃擴大而推明其緒於素難則心領而神會者也至朱彥修則守有三傳之弟子而於明之亦聞而知之者也予嘗謂曰神曰聖在明之傳傳之寔者曰巧在彥修亦不得而讓焉天神聖已絕躋攀工巧猶可力造而彥修其醫家之

梯航哉然自唐王冰孫思邈以來僅此數人謂高醫
不世出詎不信歟金陵近年有外科范連城氏予嘗
見其治背疽一收効於戶特王公再收効於守備黃
公即此二事使有如彥修之醫案不當書之耶予之
所知如此予之所不知者其所當書又下知如何也
予日者以濕熱下注俄癰於陰時連城已隨駕北
去求之范氏乃延其子魯治之而愈使有醫案之類
茲又不當書耶連城體肥而多髯于思而便便其辭
質其心恪忠信人也魯尚青年其施治之間如郢人
之運斤蓋小心敬慎綽有父風者也夫高醫之難遇

如此而予得之范氏父子安得而不表章之耶用是
述其事以歸之昔元遺山序明之書其後修元史者
悉錄以為明之傳豈徒以遺山之文奇抑亦以明之
之事核顧予文安能奇而事核則無愧焉後之作亦
技傳者或有取於斯

賀龔君廷錫甫暨配同受封序

人生教子入仕而伉儷俱獲封焉人子服官任職而
得推恩於其親焉此古今以為榮而人情之所同然
者也茲於清江龔氏見之矣蓋廷錫甫以子師顏各
官郎中貴獲封冬官主事而其配彭氏安人以服

言則綈袍霞衣之在躬以 綸音言則

天章奎畫之在軸榮乎不榮乎於是郎中之僚朱君以忠合一部諸君僉謀爲文以賀而授簡于予竊謂伊川程子論乞封於妻則不可於父母則可考亭朱子以父母當得告詞時陳君舉當筆嘗奉 致書豈非以君寵之爲榮而榮親之爲重哉是諸君之致賀宜也予聞廷錫甫乃隱君子之流允正家四禮悉遵先儒所定儀節行之其庭訓嚴而有方厥配彭又女中之賢明者所以並膺是榮豈偶然而已哉若郎中予嘗叨署司空之篆其文學之純深吏事之精練操

執之堅定予每視爲畏友則其方來爲親之榮當不止於此而已矣日者卽中移疾西歸得無念高堂之具慶所謂一日養不以三公換欵雖然昔尹和靖入仕必質諸母要以親在子不得自專卽中其尚俟親命哉予恐其欲久於家庭或亦未之能也

南浦謳餘序

友道居大倫之一不可謂不重也世變俗末知其爲重者不多見焉於不多見之中而獲見之則其人焉何如哉若大尹李君逢明之於僉憲李公元白其賢可知已元白歿于官去家雲菊弭水之上道路且萬

里外無紀綱之僕內惟慘戚之發迨上旅櫬而欲
首丘之是正焉不甘難乎逢明乃語人曰某與元
白同里閭氣義相得今至此吾之責也即解組爲
元白治喪且挾之以往巡撫陽明王公方伯陳公
憲長伍公太守吳公莫不聞而義之陽明復有所
作以彰其美一時和者甚衆卷軸皆盈通守汪君
孟鼎徵予序之予曰此義視柳子厚以柳易播殆
又過之蓋彼之所處於其生而此之所處於其死
在彼爲作郡在此爲棄官昔之人謂於一死一生
一貴一賤以見交情者逢明其無媿哉小雅伐木

之詩神之聽之終和且平漢卿寄天下以為賣友
然則薦於朋友豈但可以免人非雖鬼神且福之
矣逢明以科第發身鳴鐸有善教製錦有善政薦
於朋友特其一事耳抑予聞元白之卒窻案視其
篋空無所儲莫不嘆息元白誠廉士哉然於此又
可以見逢明取友之端大抵以利合者患難必相
棄以義合者患難必相收於此益信

大宰龍山王先生慶壽序

科名而取大魁仕宦而至大拜與夫請老而歸驛
漫平老耄之境而康強矍鑠焉此皆希聞不恒有

之事以至子焉而後登臺省有位于朝而於壽

筵初度猶得以拜家慶而遂稱觴膝下之願不皆

希濶不恒有之事乎茲於龍山先生見之矣先

生辛丑狀元官至太宰自其懸車以至於今年幾

八十矣耳目聰明視彊壯人無少異歲之九月某

甲子寔維誕辰嗣子陽明都憲公方被召命乃

具疏懇陳以展赴闕之期以躬綵衣之戲由今

觀之所謂希濶不恒有之事非歟然以先生為之

父以都憲公為之子殆不止於是焉先生甘盤舊

學格沃於廣廈細旃固有人不及知而史氏必書

之者至於狀元之名著於天下而傳於後世一時同年之士皆謂中某人榜焉兼是數者則名之壽於兩間奚止於年之壽而已哉若都憲公承過庭之訓為曾氏專用心於內之學而蚤歲亦嘗留意於橫渠尉繚之注以故年時出其緒餘見之武事功蓋天下異日史氏有不勝其書在先生既足以自壽其名而又有子以相與為壽焉則固超乎年壽之外矣江右三司若方伯陳公憲長伍公都閫余公輩咸以此意授簡於廉屬綴文以為慶康於先生何能為後特以喜為天下道也於是乎言

廷尉山齋鄭先生赴召序

聖天子登極厲志中興之業於在位之賢否陳之黜之皆慰輿情其向為僭逆所構害者乃特起之如仁和胡公甫陽鄭公是已二公初起都憲

上意猶以未預朝政耶 召胡公以少宰 召鄭

公以廷尉蓋駁乎置之左右矣拜汲黯於淮南不若禁闕之裨補任仲淹於環慶豈如天章之條陳自昔已然匪今為然也鄭公都憲之起實撫江右蓋公提刑宣化舊治之地公嘗大以問豺狼嚴以馭鴈鷺甚為群小所不便至於堅守禮法陰折

今將之萌最爲僭逆所難受故其得禍寔由於此
茲重臨焉君子仰之小人畏之而瘡痍凋瘵之民
若稿苗之望雨也乃復奪之以去爲本省計恨公
之不留於此 爲國家大計喜公之不奄於此也
於是方伯陳公憲長魯公都閫余公偕其僚佐屬
言於廉豈亦以廉素辱公愛也乎公之端嚴信於
交游氣節闡於天下學術重於儒林其所以舉廷
尉之職者第以無冤民與民自以不冤而已乎此
特一節耳若夫因 主上好生之德輔養成就如
大舜之好生洽于民心焉則孟軻氏以羊易牛之

論程叔子方春不折之說所以預養是以而贊為
仁之術者其可少哉近君之地何者而辨其所
任新政之助端有望焉公其畝之公號山齋繼
紳以山齋稱之云

贈經歷楊君考績序

前代考課有上中下九等之目觀陽城之自考下
下盧承慶之考督運官有中下中上之別槩可見
矣本朝考諫之法載之諸司職掌曰稱職曰平
常曰不稱職其等惟三三載則一考九載則通考
一官之考則亦惟三外任有三載而不得考者有

九載而不得通考者惟京官則無不得焉此外任
所以輕於內任也歟楊君廣之贊政都臺者三載
矣其考於臺之長與部之長皆以稱職書之此即
前代之所謂上上考也廣之以毛氏學領浙薦刻
忠南省乙科以先太尹去世惟母太安人在堂欲
得祿以為養遂俛焉就職掌教鄧州而陟光祿署
正由光祿而陟今官凡京官考績例當 陛下見
廣之瀕行其僚友彭君子惠方君時鳴詣予為文
以壯行色且言廣之在官下事母甚孝入仕若干
年猶清貧如未仕然則廣之之數歷每舉其職至

於今之考最者豈偶然而已哉予於廣之舊志
方二君之意乃不辭而序以送之

三老問年齒序

此三老問年齒也龐眉鶴髮古服古巾不知何許
人亦不詳其姓字周有二老而多其一唐有九老
而少其六在十去柒滿五除二新城三老亦惟董
姓壺関三老要為茂名予方疑焉忽有言於列者
曰黃衣者憑虛公子也紫衣者烏有先生也青衣
者無是公也然嘗聞之禮曰尊長與已踰等不敢
問其年此可問乎蓋踰等則不敢問此三人者孰

知其逾等不逾等哉其問年又何不可之有哉於是青衣者曰吾始生之年吾不知也但見鑄銅人時已五百年矣紫衣者曰吾初度之辰吾不知也但見蟠桃結實已十三次矣至黃衣者曰吾懸弧之旦吾不知也但見海水變田今滿十籌矣語畢三人撫掌而笑山鳴谷應聲振天地雖三島十洲為洪濤巨浪之所隔方壺員嶠非飈車羽輪之可到亦莫不聞焉由是人間相傳有三老問年之說其以此哉歟衛徐君命畫史貌之以為冲虛龔公壽公持以示予屬序於其上夫三老者豈世所謂

神仙壽乎壽莫壽於神仙徐君以此壽公其意厚矣予不辭而為之執筆亦徐君之意云

家宰羅公整菴觀省贈詩序

此南都公卿而下贈家宰羅公整菴觀省詩也必宰玉峯朱公謂贈言以詩而詩必有序考之三百篇則已然矣若松高烝民諸什此贈言以詩者也若詩大小二序此詩必有序者也於是諸詩者屬庶序之并以為贈有不容以無陋辭者焉夫家宰之疏請歸省也以尊翁栗齋先生眉壽在堂也聖天子重遠其意而許之且俾馳傳以行此特

恩也此在大臣有不能以盡得者也嘗謂先生天下之達尊也以賢科起家由國子師而封太史由太史而封納言由納言而封少宰其初封煥者由耆而耄茲由耄而望耄又將由望耄而趨期服也養之深省察之密由士而希賢由賢而希聖凡若是者豈非所謂通尊者乎溯其承傳自厥先博仁以上遠有端緒而其三令子皆親受過庭之訓若家宰之造詣純篤操履堅定執法之皎然潔白水樂有聲納言之十載親勞脫屣朝絃賢君之多萃于一門則夫問安侍膳之間溫清定省之際豈徒

以貴盛之為榮如昔人所羨陳秦國之三子侍立
左右坐客不安至於求去而已哉要知先生之榮
以道德為斑斕以仁義為品益以忠信為敬為甘
旨脩灑其榮也蓋有出乎世之人之所謂榮者矣
然先生教忠一念未嘗一日而忘自家宰以至二
季固當次第而出以体先生之心冢宰有君命
且九重倚毗甚切不得久留若執法若納言詮
部催促以起者亦屢矣仕而養上而仕是宜更迭
而為之哉詩若干承玉峯之委因僭註其意而為
之序云

揚文恪公文集卷二十五

楊文恪公文集卷二十六

序

送俞憲方君時鳴之任序

兄弟登科者有矣至於同榜者少也連仕者有矣至於授職轉官往往同者尤少也夫以遭際之同而又難為兄難為弟難為並秀者又尤少也方君時鳴與兄時舉偕中戊辰進士非登科同榜者乎往歲時舉授主政時鳴授大行人今歲時舉以正郎轉少叅於兩浙時鳴以柱史轉俞憲於廣東銓衡之注擬寔聯一疏九重之簡命並出一俞非授職轉官之同

舊者乎夫以政事文章氣節行義人所難能而時舉
時鳴皆兼而有之又豈非所謂競爽並秀者乎時鳴
將之官其同寅循故事贈言僉以見屬予方嘆其兄
弟以為稀有之盛事而諸賢誦時鳴之美不置或謂
當王公伯安之在鴻臚癯然儒者時鳴即首薦之謂
有文武才足當大任卒之果然當胡公永清變告逆
藩禍出叵測人不敢言時鳴獨申救之得從輕典或
又謂值主上新政之初有大臣受譴人言覲顏在
位者時鳴竟論罷之

或又謂臺中惟河南

道署京官考績詔時鳴為臺長所選任劑量審而出
藻公夫以時鳴之見稱於同寅如此信賢矣故顧以不
腆之言又奚庸辭然贈人以言予何足以當之獨常
愛 本朝薛文清公有云以名位期人不若以德業
勉人求之於昔兄弟立朝若南豐之曾氏若眉山之
蘇氏若河南之程氏其政事文章氣節行義皆絕出
於人而二程夫子則又接乎千載道學之傳者德業
之云無逾於此高山仰止景行行止時鳴往哉予於
賢伯仲有望焉

贈顧侯赴召序

重內輕外古今所同然也故不欲出者來薄淮陽之
疑得而入者致若登僊之美我顧侯民表以甲科優
令吾豐者凡五稔至是始有風憲之召夫甲科今
之仕進第一途也有如顧侯之賢之政且以是科焉
出而復要之以歲月之深則其得之也為不易矣用
此觀之則重內輕外不於此而益驗哉侯頻行吾豐
之士夫傾城合餞于曲江亭上有言於列者曰吾豐
地瘠人稠四民之習不一蓋色色有之獄訟之繁興
而狡偽之充斥也強梁之橫出而結納之巧伺也凡
此四患來令吾豐其肅三者固不足言既為能者不

過與之周旋委曲支持目前至於長奸惠惡殆有甚焉侯主未幾四患寢綏今則幾乎息矣侯於世味於名利皆淡然無情人莫得而投之其處事一裁之心其為政每寓乎教本之以靜而輔之以嚴至於暮夜之金未嘗至其室也復有言于列者曰侯去矣使代之者弗若焉則上元之賽燈重午之競渡與夫屠牛之市誰復過而問焉將見百孔千瘡種上復出如曩時矣於是黃童白叟為之攀轅為之卧轍侯不得行廉與諸在列因解之曰侯茲往也不聞河潤千里者乎其尚有以及於吾豐也况斗斛之水不可以容吞

舟之鱗枳棘之蝥不可以栖垂天之翼又況以 君
命召不俟駕行者哉衆皆唯 於是吾輩各舉醖屬
侯祀較而別

弋陽汪氏族譜序

譜之不可不有也尚矣有之則昭穆序尊卑辨姓氏
別本支明魏晉以來率重茲事而其為譜則今無所
考焉其可見者雖宋歐蘇二氏之作而已得非以其
入與文而傳歟嘗觀唐書有宰相世系表謂諸臣各
修其家法以門族相高或父子繼相或數世並顯此
則史官之所作是亦譜之類也要之歐蘇之譜家之

譜也若世系表國之譜也然譜不貴於博而貴於慎
務博常情之公病務慎非賢者不能也今觀弋陽汪
氏譜其慎矣哉汪氏入國朝自教授公三世至叅
政公偕四子並登甲科四之中三為翰苑今三之中
進為吏侍禮侍者二豈徒名位而已其學術其德業
恒以大賢自期待以醇儒為歸宿又有在於繼相並
顯之外者其人重則其譜亦重異時弋陽譜不廬陵
譜不眉山譜歟至於脩史而作世系表不本於此譜
歟夫然則家之譜固國之譜之權輿哉予與禮侍為
僚以道義相規益嘗語其譜欲予為之序予何能贊

一詞敬識此以俟

選註詠史絕句詩序

新安程學士嘗編詠史絕句詩學士所編學士所好者也予從而選之予之所好者也學士之不能盡同於作詩者而予抑豈能盡同於學士哉譬之飲食鹹酸苦辣人之所嗜有不同耳詩凡若干首略加註釋俾童穉誦習者得以創通大義云

選註定山莊先生詩序

近代之詩大抵只守唐人矩矱不敢違越一步惟陳公甫莊孔暘獨出新格其高處又不論唐人矣予好

公南詩旣選註之好孔賜詩又選註之並存其本以俟世之君子有同於予者而共賞音焉

重選疊山先生註解唐詩絕句序

程子謂古人之詩如今之歌曲雖閭里童穉皆習聞之章泉澗泉選唐人絕句詩凡百首疊山先生註而序之予猶以為尚多也乃於四之中取其一焉得二十有五首亦欲使童穉習而聞之庶幾有興於詩者耳疊山序云此詩可聯轡齊驅於變風境上竊謂三風作於風俗之純得其性情之正固不可尚已若變風桑中木瓜之類又此詩之所魚者宜曰可齊驅於

風之變而不失其正者之境上乃為得之噫安得起
疊山於九原而為我改評也哉

風雅源流絕句詩序

予選古人絕句詩以授家塾童蒙自唐宋元以至

國朝詩人所作好於宋復得瀛洛閩閩之作於元復
得劉靜脩之作於國朝復得陳公甫莊孔錫之作
類成一帙以別於前名曰風雅源流云嗚呼詩三百
至矣故邵康節謂刪後無詩然詩至宋諸大儒非三
百篇之的孤乎予嘗謂詩自刪後至瀛洛閩閩是一格
至靜脩是一格至陳莊又是一格妄謂由陳莊一變

可以至靜修由靜修一變可以至灑洛關關所謂齊
一變至於魯魯一變至於道者也不知深於風雅者
以爲何如

東湖詩集序

詩發乎情原於性而學以輔之焉學也者豈徒專上
於格調音響慕規倣矩之爲哉性情之涵養固有在
乎是也性情既正則三百篇亦不外是而格調音響
自足以兼之矣何也本之性情然也少司徒東湖吳
公平生所爲詩積成數帙予近日乃盡得而讀之起
發之餘復追其若干首別爲一集自謂知作者之意

妄加評點不知以為何如也公為人好善惡惡甚真
讀誦記識甚博所謂發乎情原於性輔之以學而得
其正蕪乎餘於公見焉公嘗假令嶺東與白沙陳公
甫遊往來淮西與宛山荅孔暘遊近代之詩至陳莊
如一大變人力天巧各臻其妙故公詩多似之間有
逼真處昔人謂詩有泐然則謂公詩無泐可乎至其
獨到固自成一家為東湖詩也自今求其詩者當求
其性情求其性情當求其學力求其切劇漸染乃為
得之予不佞請以此告夫讀公之詩者

值菴盛公薦章序

嘗讀史見前代盛時公卿大夫於朝政有失無不言
之言而未從又必繼之務至於從而後已焉賢才未
用無不舉之舉而未用又必繼之務至於用而後已
焉蓋處不諱之朝而在位有濟上相讓之美固如是
哉衰世則不然朝政之失若罔聞知非有所畏而爾
耶賢才之滯反加擠之非有所忌而爾耶觀於此篇
謂非我朝盛時事乎中丞值菴盛公往者之左遷
也給舍言之而連署焉臺端言之而連署焉其嚮用
也巡按舉之而屢上焉巡撫舉之而屢上焉當夫城
狐社鼠憑藉進奉捆載私物所過繹騷蔑有誰何者

公分司漕牒將邇其境皆偃旗仆鼓比至一聽約束
正供之外不許夾帶一毛由是飛謗徹于

九重公亦泰然處之及其遭貶也人皆以為負屈而
爭言之豈非所謂

主聖臣直而為盛時事乎公為庶訪也持之以嚴明
而老職為之束手居旬宣也守之以公正而黜胥為
之失計德優而才贍人皆冀其大用而爭舉之豈非
所謂薦賢為國而為盛時事乎觀之宋天聖明道間
治道方隆如范仲淹之貶申救者既多而論薦者不
少迨夫紹熙慶元國事將去如朱子之罷袖還御批

者之力終不足以勝授䟽相攻者之勢此何時哉
曰觀於此編以見我朝盛時之事者以此然則仕
者之逢丁昌期豈非大幸也哉左轄陳君宗禹得公
所藏本取而詮次之謂此宜為世道賀予得而閱之
敬綴數語復以為世道賀

送清狂山人歸秦和序

予將遊華胥氏之國童子走報有客在門頭戴華陽
巾身披鶴氅衣手持綠玉杖自言清狂山人予驚喜
曰望之久矣乃肯來耶倒屣出迓揖之草亭延之上
坐山人謂予何以見告予曰尋常拜觀孔子及程朱

一聖三賢之像作者皆有遺恨山人曰此事吾能為之盤礴間忽見一人其顙似堯其項類咎繇其有顙子產溫而厲威而不猛恭而安果孔子之像也少頃忽見二人一人揚休山立盎然春風一人面色嚴冷凜然秋霜果程伯子叔子之像也又少頃忽見一人面有七黑子如七斗狀從容禮法果朱子之像也予謝之曰若此者使日日而張之則日日聖賢在目也時時而張之則時時聖賢在目也豈不足以起後學敬仰之心乎他如貌番侯如婦人女子貌四皓鬚眉皓白衣冠甚偉其餘如山水如樹草恣意點染俱出

人意表妙矣哉山人之所為也為畱兩月餘予何所
作惟與之抹明月批清風沐曉露晞朝暎敷烟霞於匡
床斟沈澗於清樽如此而已山人一旦揖予將御風
而返援而止之不可得也乃歌而送之山人郭氏仁
弘字泰和人歌曰繁山人兮聰明妙比握彩毫兮揮
霍不止天機斡旋兮不見斧鑿鬼神出沒兮莫窺端
倪如洞庭之張九奏兮無首無尾如廣寒之舞霓裳
兮無終無始當其豪放兮孰堪任使調東海以為丹
青兮鋪大空以為素紙衙官公麟兮僕命道子餘人
碌碌兮又何足齒彼孫思邈之叔方伎兮有識所訾

山人蓋隱君子兮非畫史

風憲忠告存額序

風憲之名何居風如所謂樹之風聲之風是也憲即所謂監於先王成憲之憲是也忠告云者忠告而善道者也元張養浩氏嘗著為風憲忠告之書今左轄高吾陳公復有存額之編豈非事異而意同者哉蓋公於本朝得嘗為風憲諸公凡五十有五人其事蹟散見於傳記諸書及各家文集者網羅未取幾無遺恨昔朱子編宋名臣言行錄皆用此法公其取法於是哉竊謂今制內外臺官並稱風憲祖宗列

重鎮示憲綱外則居而察一方焉內則出而察天下
焉又為則居而察京師焉夫百司各有所職甲兵
不雜乎錢穀禮樂不預於刑名惟風憲則橫貫乎百
司之中無所不當理無所不當問則此職之不輕而
重也較然矣公於是編謂將資之以為私淑之地正
以嘗掌外臺之時而歛以之而勉乎已也然公豈獨
勉已而已哉亦所以勉人也勉已則諸公之治行乃
忠告於我勉人則我以諸公之治行忠告於人此成
已成物之意而豈徒哉公位益進重臨吾省來旬來
宣沛膏澤於湖山千里之外豈非德性學術加人一

等與在外臺無所不理無所不問閱歷之多諳鍊之
素而然乎抑公既察一省於已往而資望之積且重
復如是焉則夫總之以察天下以察京師特匪朝
夕耳王通有言如有用我執此以往康於高吾亦
云

儀禮注疏序

經名儀禮所載行禮之儀所謂禮儀三百威儀三千
是也魯恭王壞孔子宅得儀禮五十六篇至高堂生
所傳惟十七篇爾鄭康成從而為之注賈公彥從而
為之疏二家之說叔之十三經者什不一二讀者病

焉少宰靜齋陳公一日寓書於廉曰儀禮亡失如獲而注疏復缺畧如此固不能完孔壁之全獨不能復鄭賈之舊予於此訪求二十年矣始盡得之手編成帙幸為序之然則公之好尚古禮為何如哉竊謂此學各有所因而入二程朱子則以敬而入者也張子則以禮而入者也靜齋之於儀禮如此豈特如韓退之所謂揖讓於其間而瑣瑣於儀文度数而已哉蓋為張子之學亦以禮而入者也抑禮者敬而已矣誠至於禮焉則程朱之學又豈出於是哉公嘗提督全楚庠校每以此學風厲諸生詩曰維其有之是以似

之觀於此舉樂可見已

八恪公文集卷二十七

寧海潘頴校正

後學陸時泰

朱冕編集

記

易菴記

三代以還教化不明師道不立士生其間往往
人自為學故多雜而不醇明道程夫子嘗言顯
接人多矣不雜者三人張子厚邵堯夫司馬君
實世變愈下醇而不雜之學不絕如綫甚至詬

病迂闊則曰道學凡父兄之所以詔其子弟惟恐其為此而不切於世用朋友中有尚此者越雪蜀日無不吠之遂以正心誠意為厭聞居敬窮理為大戒此豈道學之罪哉人不為道學者之罪也庶舅氏劉先生天資近道早年用力於小學四書晚而通易先生讀書必欲反躬實踐匪資口耳間發於詩文不越乎人倫日用之常如布帛菽粟久而不厭庶每侍焉聽其言論矚其作止恒以為斯世而有斯人先生嘗名其菴居為易且命庶記于壁間竊惟易者先生之

道也先生雖繩趨準步事事隱括以歸于理然未嘗立門戶脩邊幅與人言以其所可及而不強其所不能是以知德者見之固識其為有道之士而庸人懦夫與之處亦不至有所驚駭而皆以先生為長厚君子也先生之所謂易得非身有之而然哉庶於先生之易亦有志於願學焉者敢以鄙語質于先生

武寧縣學舉人題名記

武寧儒學舊有舉人題名之石起自洪武甲子聶君以大羅君士應至景泰庚午瞿君璞而止

總之十六人自是以後歷科十二歷年三十有六竟無繼者手掌一碑如銘景鍾書太常之難其亦可怪也成化丙午春掌教陳君貳教譚君張君一日閑聚指石刻而談曰人才如是而幽蟄自若在物理有不當然者古人有言三年不蜚一蜚冲天是歲之秋寔賓興賢能之期芹泮之間必有聯翩而起者舊石就泐已去趺而橫砌不改圖之則前者湮沒而後者無地矣於是大尹馮君聞而是之即更以貞珉重鐫其舊復大虛其左以俟今秋之聯翩與後來之躡武者

而徵記於余焉嘗謂武寧為邑在宋元時取進士者屢有其人於國朝則無之自洪武永樂以來領鄉薦者屢有其人至於今日則無之其勢如下坂然亦至於極矣物極必反觀氣數而驗人事則亦有可前知者焉昔者武寧之讖云水打甘羅坊上士入朝堂今如其讖矣昔者願學宮之西遷面柳山之文筆今如其願矣此氣數之可知也往之官于校者果有如陳如譚如張之勤於教者乎令于邑者果有如馮之善於作興者乎養育於是者含鋒蓄銳果有如今日

之彬彬者乎此人事之可知也則夫麟角鳳嘴
煎膠續絃以接庚午之後者在於此時也雖然
豈惟鄉薦哉由此而進則所以攀宋元之逸駕
者有不難矣馮君其別置一石於所謂進士者
刻其已然而待其將然亦未為不切於事情也
其母曰得隴望蜀哉馮君名琦字閏卿鄞縣人
陳君名通字弘明仙居人譚君名塤字汝和新
會人張君名猷字大升遂寧人是歲二月朔記

秋簾清暇圖記

弘治己酉江西鄉科蔭秀巡按藩臬諸公既付

文衡於主司復選取印縣官之起家進士而有文
學者置諸外簾以叅任其事其杜關節而精玉石
之辨亦嚴且密哉於時南昌推府鄧君與焉君其
所謂起家進士而有文學者至則周慎明察誠非
他人所能踰逮竣事諸公咸以為才復擢按治豐
城一日出所謂秋簾清暇卷者俾予記之蓋盡工
所獻試院圖君得之而命以茲名云君筮仕郎磨
理官朝夕與諸衣關木之徒相辯駁其所以燥吾
吻沸吾耳有不可勝言者且居會府日往來諸司
騎不脫銜轡今復兼理劇縣旦秉燭視事樵鼓起

方散衙是安得如此地之清而簡哉宜其心之不
能忘也試院在豫章子城東涵以重湖一碧萬頃
其間宮室整整如畫壁立望遠之樓延袤覆道之
屋皆近時漸次而增者予嘗三試於此叨舊而去
今復展而玩之乃知不獨諸生之得以摩空吐氣
于此而凡執事於此者想其風露秋堂棘垣鎖寂
逸興高懷有不可遏者矣則夫君之不能忘者豈
非人之情哉雖然凡興賦乎前者固有清簡煩劇
者亦存乎人耳程明道監試無事嘗推邵康節數
學周濂溪為南安司理亦未始廢太極圖說易通

有志之士清簡而為程之所推煩劇而為周之所
不廢是誠在我而在外乎哉君長材大器無施不
可仕優則學其真遂矣予之為君喜者在是若曰
名位之來又奚容喙

雲林書屋記

雲林書屋者丁君天和藏修游息之所也予每造
之愛其幽雅不能去其屋三楹中為坐憩之所右
庋書籍左設寢榻窗戶間架廣狹相稱如周公之
畫井田疆界整整其屏几用器皆精絕如李賀黃
庭堅詩無一字塵俗其花木竹石行列不亂如程

不識諸葛亮之兵部伍嚴肅於此可以見丁君之才矣彼闖葦苟且之人墻傾壁倒動以陳仲舉藉口政不知謝幼度於屐屨之間事未嘗不得其任卒然用之果能破淮淝百萬之師仲舉固可人然幾事不密既無救於東都之亡而身且不免其節自疎闊固已見於一室之不掃矣丁君讀書為文大類其善屋室焉有如此而不能濟天下之事者其慎以將之母孤交游之望哉君一日觴予書屋中指東偏謂曰往者吾與子讀書之所今以化為烏有先生矣倘不遺舊其為我記夫今日之新作

者予欣然諾之為之執筆

定林書屋記

庠友文君鉞結屋鄉之定林讀書其中其處草舍數間山田數畝圃蔬數畦而已文君家邑城游侯類而惟此焉樂一歲之中三之一於家十之一於學其餘固於此乎在也彼數間者南窗北牖雖可以容膝數畦者早韭晚菘雖可以登盤數畝者高黍下稻雖可以糊口然亦荒閑寂寞之濱爾文君獨戀戀其間豈非用志之堅苦而然乎范文正讀書長白山斷崖畫粥邵康節學於百原王勝之嘗

乘月訪之見其燈下正襟危坐及其成就一則為
有宋第一流人物一則為千古人豪得非亦以其
用志之堅苦而甘於荒閑寂寞之所致哉要之為
學須吾之境內外俱靜而後可蓋靜則可以運精
神而於學也有力否則在於已者既無以澄之而
在於外者又適足以撓之望學之有成不可得矣
諸葛武侯謂學須靜也程明道謂性靜者可以為
學文君之外境靜矣其所以能樂乎此謂非內境
之俱靜不可合內外之境而一於靜久之明睿自
生讀書窮理沛然矣文君其勉之先是鄉先進可

秉英為賦定林書屋詩後予亦續貂數語又其後
清江丁玉川為之圖撫州太守周梁石為之題扁
至是文君復俾予為記蕪累之言一之謂甚其可
再乎辭不獲乃為記之

翠栢軒記

徐君德厚豐城隱溪人也明敏端慤被服儒業恢
弘先世之富貴于丘園嘗於軒前植栢日玩其後
凋之操因題曰翠栢軒一日以書抵張君世範疏
其大旨求予為之記夫一草一木之微皆足以窺
造化端倪然唯深於理者能之周子之不去草謂

與自家意思一般程子之觀梅謂各有一乾坤是
豈見草與梅者哉撫松而盤桓何可一日無此君
者未必察識至此也徐君坐茲軒唯栢之玩其必
有得於霜皮溜雨黛色參天之外若曰空庭晝靜
揮翰題詩則綠陰落硯林梢雨歇支頤望之其翠
欲滴雲破月出酒醒夢回影橫窓櫺間清氣逼人
是固栢之助然以是求栢亦以淺矣抑栢之為材
可以為宮室可以為用器要為有功于世也君父
壁雍嘗輸粟景泰間以助賑飢朝廷為旌其門
六世祖德順在勝國時嘗貽書揭學士奚斯言淘

金戶之害揭公聞之于朝遂蠲其課君之濟乏有
父風而今日之豐城豈無有如淘金戶之可言者
詢之鄉邑中果有如揭文安其人尚為爾祖續盈
尺之紙若然則雖逃斤斧于滄江野水之湄亦不
害其為材矣莊生欲以壅腫卷曲者樹之於無何
有之鄉殆非吾儒之論諒軒中之人亦所不取也

歎齋記

人不可自足乎足於外可也人果可以自足乎是
於內不可也軒冕之貴金玉之富此其在外者也
人之所當聽乎天者也苟無自足之心則非知命

者矣仁義之美道德之懿此其在內者也人之所當盡乎已者也苟有自足之心則非知性者矣孔子一衰周之旅人蔬食飲水樂在其中顏子一陋巷之匹夫簞食瓢飲不改其樂其於外也何如至於內則以德不修學不講為憂以有若無實若虛自處凡若此者無非汲汲乎其內也世之弊精神竭思慮殫智力窮日夜以求滿其溪壑之慾不得則悲憂愁嘆何時而可已也嗚呼士而未至於賢賢而未至於聖聖而未至於天道皆未可以自足顧足於此而不足於彼何也其亦不思之甚哉吾

邑艾岡有長厚君子劉君華文嘗以歎名齋其亦
致力於內者乎君外境皆順且能守昔人知足之
戒者其必致力於內也或曰若蚤歲為科舉進取
之學欲振伯兄太守公之業竟莫之遂今雖膺
朝廷尚義之旌受仕者冠服之寵恒以不副初心
為恨又素慕古豪傑士欲以功名自見於汗青間
今皆不得施矣居常兀坐自謂不如古人有忝家
世其所稱歎如是而已若是猶外也推君之心當
不止於是如其不信請問之君

南岡別墅記

豐城熊君子楫世家杭溪之上至子楫植產新建之厚田作屋於勝處南岡以據山泉之要會當林木之喉襟置筆牀茶竈琴阮釣具於其中以爲游賞之所命之曰南岡別墅焉蓋屋於山林田野間故謂之墅而別墅云者別於杭溪而言也君或在杭溪或在厚田至厚田則燕休於是而所謂山泉林木充君几席間物矣然是幽閑之趣唯高人達士可以有之常患於力之所不足至於大有力者又不得流連荒亡於是隋煬帝自長安至江都置離宮四十所宋徽宗築艮嶽置花石綱卒之殺其

而倘其國豈非君人者一日二日而有萬幾而三
風十愆所當深戒哉陶靖節杜少陵盧玉川輩可
以樂此者然陶止於草屋八九間杜茅屋為秋風
所破廬則破屋數間而已矣是則樂之而無患為
之而有餘力其唯熊君乎君以高人達士而資產
充牣固宜其克就乎此也抑豐城新建相接壤而
瑞河一水邇迤匯象潭厚田寔當其間泉甘土美
俗厚人淳雖家焉可也奚直別業登臨而已乎君
既樂其勝且介其子壻劉觀求予為記觀予內弟
也因以復之君焉

移萱記

予來莊後湖版圖之次年是爲弘治壬子是歲夏
六月始宿于湖中文冊新陳浩如烟海竟日繙閱
疲極心日時靈雨連日暑氣鬱蒸無所於休其体
顧荷浦柳隄不遠伊邇有不可得而即者偶覩廳
事左偏度閣之前有萱且花惜其處於隈僻人踪
罕到而予方求所以少滌吾煩襟者幸得焉即累
畚乎廳事之後移植其中冀以簿書之暇得資游
息庶乎在我者常逸而所以委頓乎前者無以洎
吾胸中之天否則心清時少而亂時多欲其不爲

所汨難矣移萱之次年是為癸丑春三月予再宿
于湖中觀其根葉繁茂生意勃勃真若解人意而
自慶所遭者時雖未花而已可預卜其盛矣予聞
萱草忘憂又聞諼草言樹之背今茲草於吾廳事
後之臺而植焉為不失地矣而范希文所謂江湖
憂君則豈敢忘之若予來此雖甚有公事亦昔人
所謂湖中可了者而其憂固不專在是也

移蓮記

予既植萱于廳北之兩臺越歲餘得陶缸于墻隅
甚鉅以衆力畀致于兩臺之間取湖蓮之根而種

之附以淤泥浸以清泉旁萱而中蓮尊蓮也蓮何為而尊濂溪先生目蓮為花之君子若是烏得而不尊之吾郡黃太史庭堅作濂溪詩序有胸中灑落如光風霽月之說李延平稱其善形容有道者氣象此誠名言矣但太史公又有高荷為蓋兮不知何處散髮醉之語散髮晉人風致恐不可以比擬想像濂溪也雖然先生之於蓮其真趣有非後學所能驟窺至於景仰于洒落光霽之表則藐予小子安敢自棄若曰蓮之愛而同予者則誰可犯是不臆哉記移萱後一日記

恒菴記

景輝夏先生蚤游郡庠秀爽英發自信功名可攫
取而諸公貴人咸改容體貌之謂此人當不久淹
場屋既而有司輒失之乃嘆曰是毛錐子安可與
造物者爭權即返其初服隱居于小嶺之下小嶺
吾豐城之勝地其先自宋元以來世世居之地之
山水平遠土壤夷曠先生不樵不漁偃蹇其間或
捫風而談或仰天而笑或抱膝而吟或掉臂而游
得樹而庥焉臨流而詩焉自以無心經世甘與澆
耳棄瓢者相守乎蒼松翠栢之盟取號恒菴以見

志焉先生忠信人也。在郡庠與家君比舍。家君於
休致之年。每憶平昔交游。亟稱先生謹厚。不置。庶
與先生別十年餘。今歲獲拜小嶺山。高水長子陵
之風尚。在真足以滌塵襟而銷俗慮也。先生因以
恒菴屬廉記之。夫恒之為義。立心如一日。古字作
𢆶。取一舟靠岸。徹頭徹尾之意。士君子小而起居
飲食。大而綱常倫理。皆當一於恒也。若高尚特隱
者。一節之恒耳。以先生之勇退林壑。其不使猿驚
鶴怨審矣。他而治心脩身。豈可不勉。於是先生進
德之功。老而不倦。其必致力於恒哉。雖然。易曰。下

恒其德或承之羞又曰恒其德貞婦人吉夫子以
不恒之羞人固知之恒真之凶人或不察也何者
恒之為道有變有常庶願先生守其常而通其變
則於易恒之義庶幾乎得矣

瑩菴記

瑞庠藍生仲來從予學久之將歸謂曰仲之先君
子嘗以瑩名其菴因以為號今屏几猶存圖書如
故願先生有以發之以詔我後人夫瑩者玉之色
也人之制行周備即玉之無玷也操履潔白即玉
之無瑕也苟有一毫之虧缺污壞則所謂瑕玷者

不在玉而在於吾身矣昔徐孺子以生芻一束芻
郭林宗取詩其人如玉之意尹彥明問范滂夫之
為人伊川先生答以其人如玉夫以林宗之凜然
風整淳夫之色溫氣和固可謂王之瑩者矣然瑩
於外孰若表裏之俱瑩東漢人物崇尚名節不緇
一綫則有之而於道則未也若滂夫以宋儒之懿
宗伊洛之道唐鑑一出伊川謂其乃能相信如此
其亦庶幾乎表裏之俱瑩者哉瑩菴之瑩予雖不
可得而知其必致力於此矣瑩菴堂輪粟濟飢
延旌其門而長子某述瑩菴之事朝廷復錫之

官今仲也青年奮志他日厲赫宗之節學淳夫之
學允見瑩菴之家教哉瑩菴諱玉字碧澗其居高
安之大成則自筠州牧某始云

觀澗記

予讀孟子觀水有術必觀其澗至朱子集註則曰
此言聖道之有本也乃知觀澗之言固非為水而
發矣蓋謂聖人之道見之於德行形之於事業自
一身之微至於參天地贊化育人見其大也必有
所以為大者焉猶之水奔放崩騰悍迅衝激人見
其澗也而必有所以為澗者也所以為大所以為

濶類非有本不能也。絳漢絕港奚有於濶。諸子有
家奚有於大。若是者皆本之則無耳。然則聖道之
本安在。不出乎一心而已。是心也。四端萬善之所
備。三綱五常之所該。河之崑崙。江之岷山也。世惟
心學無傳。則其為道無本。而其小也。亦固然矣。杭
溪熊君名濶。字子觀。讀書求道。絕意軒冕。別以觀
濶為號。蓋合名與字而取義也。時文士詩人述之
詳矣。君復介庫友丁君祖。屬予為記。君非觀濶者
也。求聖人之道者也。聖人往矣。求其道亦惟於方
冊間而已矣。求聖道於方冊間。則所謂參天地贊

化育者其濶也所謂心者其本也或曰孔子直指
川流嘆道體之不息而程子亦曰水流而不息物
生而不窮皆與道為體以是論之濶即道也惡用
外求之乎予曰不然孔孟之言各有所主而必以
水為道天地間豈獨水為然哉天地之覆載日月
之照臨寒暑之推遷草木之榮悴無適而非道也
但孟子之言不過借彼以喻此耳況於水而求道
曷若於道而求道於道求道則無水非道於水求
道則無道非水五經四書聖人之道之所在也果
能即此而求之則隨其人之工夫淺深自有所得

不然則雖終日端坐于浩浩蕩蕩之傍恐未見其
如何也或以此言告之熊君君曰吾居杭溪溪上
之所得雞肋耳真不若吾書之有所得也未幾丁
君來督記予遂筆此以遺之